

lenti, non oscitantes, non parcentes vocibus, non præcidentes verba, non integra transilientes, non suffractis & remissis vocibus muliebri quoddam balba de nare sonantes; sed virili, ut dignum est, sonitu, & affectu Spiritus voces depromentes. Si enim homo exprimens adversariorum malitiam ac propriam deficientiam, & miseriam, & captans Regis benevolentiam, & petens ab Adversariis victoriam, & adiutorii sufficientiam, ac de propriis malis veniam, studet exquisitè loqui ante Regem, nihil omittendo de iis quæ debet loqui, multò magis orans, & psallens ante Regem Regum debet exquisitè loqui Psalm. *Quoniam Rex omnis terra Deus psallite sapienter.* Vndè narratur de Dæmone cui nomen Titinellus in tractatu de universo, quod apparuit cum quodam cophino ante quosdam psallentes, & colligebat sub specie micarum dictiones vel syllabas omittas ab eis in psalmodia. Vndè Versus:

Fragmina verborum Titinellus colligit  
horum,

Sicque die mille vicibus se sarcinat ille.

Et ibidem narratur, quod cum quidam religiosi inordinatè, & indecenter psallerent, unus ex his Spiritibus irrisoriè effigiavit eorum turpem, & indecentem psalmodiam. Et in libro miraculorum Beatæ Virginis narratur, quòd, cum quidam Monachus ad Vigilias dormitaret, & ad *gloria Patri* caput non humiliaret, apparuit Angelus dicens, *flecte caput, quia dicitur gloria Patri: & Diabolus ex alia parte, non flectet nisi triplicem ruperis funem, quod videns Abbas, & audiens oravit dicens:*